

五

倫

書

五倫書卷之二十三

商湯妃有嬖者。有嬖氏之女也。湯娶以為妃。統領九嬪。後宮有序。咸無妬媚逆理之人。卒致王功。君子謂妃明而有序。

周太姒。仁而明。道文王。嘉之。親迎于渭。太姒事太姜太任。旦夕勤勞。以進婦道。號曰文母。文

王治外。文母治內。

邑姜太公之女。武王后也。生有聖德。武王曰。予有亂臣十人。十人者。邑姜其一也。君子以爲九人治外。邑姜治內云。

漢和熹皇后鄧氏。元興元年。和帝崩。長子平原王有疾。殤帝生始百日。后乃迎立之。尊后爲皇太后。是時新遭大憂。法禁未設。宮中止大珠一篋。太后念欲考問。必有不辜。乃親閱宮人。觀察顏色。即時首服。又和帝幸人吉成。御

者共枉成以巫蠱事遂下掖庭考訊辭證明
白太后以先帝左右待之有恩平日尚無惡
言今反若此不合人情更自呼見實數果御
者所為莫不嘆服以為聖明

唐文德皇后長孫氏初隱太子釁閔已構后內
盡孝事高祖謹承諸妃消釋嫌猜及太宗立
為后後庭有被罪者必助帝怒請繩治俟意
解徐為開治終不令有冤由是下懷其仁焉
宋章獻皇后劉氏真宗崩遺制尊后為皇太后

時柴氏李氏二公主入見。猶服髮髻。太后曰。姑老矣。命左右賜以珠璣帕首。潤王元份婦安國夫人李氏老髮且落。見太后亦請帕首。太后曰。大長公主。太宗皇帝女。先帝諸妹也。若趙家老婦寧可比耶。賜族人御食。必易以釵器。曰。尚方器勿使入吾家也。常服絕襦練裙。侍者見仁宗左右簪珥珍麗。欲效之。太后戒曰。彼皇帝嬪御飾也。爾安得學其治內多類此云。

慈聖皇后曹氏武惠王柁之孫仁宗后也慶
曆八年閏正月望夕後三日衛卒數人作亂
夜越屋叩寢殿后方侍帝聞變遽起帝欲出
后閉閤擁持趣呼都知王守忠使引兵入賊
傷宮嬪殿下聲徹帝所宦者以乳嫗毆小女
子紹奏后叱之曰賊在近殺人敢妄言耶后
度賊必縱火陰遣人挈水踵其後果舉炬焚
簾水隨滅之是夕所遣宦侍后皆親剪其髮
諭之曰明日行賞用是為驗故爭盡死力賊

即擒滅閭內妾與卒亂當誅。祈哀幸姬。姬言之。帝貸其死。后具衣冠見請論如法。曰。不如是。無以肅清禁掖。帝命坐。后不可。立請移數刻。卒誅之。

金明惠皇后王氏。宣宗后也。於宮中就食。尚器有玉盃。標三一。奉太后。二奉帝。及中宮。荆王母真妃龐氏。以瑪瑙器進食。后見之。召主者責曰。誰令汝妄生分別。荆王母豈卑我兒婦耶。非飲食細故。已令有司杖殺汝矣。是後宮

中事真妃有加。君子謂后能睦族云。

元昭睿皇后弘吉刺氏嘗率宮人親執女工。拘諸舊弓弦練之。緝為紬以為衣。其鞞密比綾綺。宣徽院羊牯皮置不用。后取之合縫為地毯。其治內勤儉有節而無棄物類如此。

伯顏忽都皇后順帝后孛羅帖木兒之女也。至元三年立為皇后。性節儉不妬忌。動以禮法自持。帝一日問中政院所支錢糧皆傳汝旨。汝還記之否。對曰。妾當用則支。關防出入。

必已選人司之。妾豈能盡記耶。帝賢之。

國朝

孝慈皇后馬氏。自正位中宮。益自勤勵。嘗講求古訓。諭告六宮。孜孜不倦。一日集女史清江范孺人等問曰。自漢唐以來。何后最賢。家法何代最正。對曰。惟趙宋諸后多賢。家法最正。后於是命女史錄其家法。賢行。每令誦而聽之。曰。不徒為吾今日法。子孫帝王后妃皆當省覽。此可以為萬世法也。

后嘗聞元世祖后薨故弓弦事亦命取練之
織為衾裯以惠孤老每製衣裳餘帛緝為巾
褥織工治絲有荒顙棄遺者亦俾緝而織之
以賜諸王妃公主謂曰生長富貴當知蚕桑
之不易此雖荒顙棄遺民間猶為難得故織
以示汝不可不知也

仁孝皇后徐氏嘗觀女憲女戒諸書紬其要義
作內訓二十篇居常志存內典奉祭祀盡誠
敬事上恭謹不懈晨夕與

皇太子言惟孝親恤民與嬪妃以下言惟恭
敬和睦言動以禮喜怒不形下人有過教之
使改亦靡不畏服焉

逮下

周太姒仁明有德能以惠下逮衆妾而無嫉妬
之心俾衆妾得上附而事之故衆妾樂其德
作詩以稱頌之曰南有樛木葛藟纍之樂只
君子福履綏之由是子孫衆多又作詩以比
之曰螽斯羽詵詵兮宜爾子孫振振兮

漢班婕妤。好賢才。通辯。始選入宮。為小使。俄而大幸。為婕妤。好。自鴻嘉之後。見帝稍隆於女寵。婕妤好。乃進侍者李平。平得幸。亦立為婕妤。君子謂班婕妤。進李平於同列。即古樊姬之德也。明德皇后馬氏。明帝為太子時。選入宮。時年十三。傍接同列。禮則脩備。上下安之。遂見寵異。帝即位。以為貴人。嘗以皇嗣未廣。每懷憂嘆。薦達左右。若恐不及。後宮有進見者。每加慰納。若數所寵引。輒增隆遇。永平三年春。有

五倫書卷二十三
六
司奏立長秋宮。帝未有所言。皇太后曰。馬貴人德冠後宮。即其人也。遂立為皇后。

和熹皇后鄧氏。初選入掖庭。為貴人。恭肅小心。動有法度。接撫同列。常克已以下之。雖宮人隸役。皆加恩借。帝深嘉愛焉。後帝數失皇子。后憂繼嗣不廣。恒垂涕歎息。數選進才人以博帝意。

三國魏文德皇后郭氏。文帝后也。初入東宮時。有所獻納。及即尊位。雖有異寵。心愈恭肅。是

時紫貴人亦有寵。后教訓獎導之。後宮諸貴人時有過失。常彌覆之。有譴讓。輒為帝言。本末。帝或大有所怒。至為之頓首請罪。是以六宮之人無所稱怨焉。

晉文明皇后王氏。性約素。雖處尊位。常謙冲接。下。嬪御有序。敦睦九族。垂心萬物。言必典禮。浸潤不行。武帝受禪。尊為皇太后。既崩。帝手疏其德行為哀策。稱后內叙嬪御。外叶時望。履信居順。德行洽暢云。

北齊武明皇后婁氏。武帝后也。性寬厚。不妬忌。神武姬侍咸加恩待。是時神武逼於蠕蠕。欲娶其女而未決。后曰。國家大計。顧不疑也。及茹茹公主至。后避正室處之。神武愧而謝焉。后曰。彼將有覺。顧絕勿顧。慈愛諸子。不異已出。躬自紡績。人賜一袍一袴。手縫戎服以帥左右。

唐文德皇后長孫氏。太宗下嬪生豫章公主而死后。視如所生。媵侍疾病。嘗輟所御飲藥以

資之由是下懷其仁

國朝

孝慈高皇后馬氏。凡進

太祖御膳。后必躬自省視。宮人請曰。宮中人衆。
無煩聖體。

后曰。吾固知宮中有人。但婦人事夫。不可不謹。
膳羞上進。不可不蠲潔。脫有不至。汝輩受責。
吾心豈安。吾所以為此者。一以敬上。而不敢
忽。一以保汝輩免於責也。豈為無人耶。宮人

聞之莫不感悅○官人有過。

帝怒之。

后亦怒。命左右執付。官正司議罪。

帝怒解問。

后爾不自責罰。付之官正司。何也。

后曰。妾聞賞罰惟公。足以服人。故不以喜而加賞。不以怒而加刑。喜怒之際而行賞罰。必有偏重。人議其私。付之官正司。則當斟酌其輕重矣。治天下者。亦豈能人人自賞罰哉。有司

者論之耳。

帝曰。爾亦怒之何也。

后曰。當陛下怒時。遽自罰之。非惟宮人得重罰。陛下亦損中和之氣。故妾之怒者。所以解陛下之怒也。○

后慈以接下。親戚勲舊之家。無不得其懽心。命婦入朝。不以尊貴臨之。延接如家人禮。

仁孝皇后徐氏。

太宗皇帝初之國北平。時后理內政。宮中肅然。

而和厚逮下有周南樛木之德焉及

帝嗣正大統后正位宮闈嘗從容問

帝曰陛下日與共圖政理者誰歟

帝曰六卿治政務翰林職論思典詞命皆朝夕

左右者也乃請於

帝悉賜其命婦冠服鈔幣且諭之曰妻之事夫
豈止於衣服饋食必有德行之助焉今

皇上所與共圖理道者六卿翰林之臣數輩諸
命婦可不有以翼贊於內乎百姓安則國家

安國家安則君臣同享富貴澤被子孫矣

后作內訓有曰。君子為宗廟之主。奉神靈之統。宜蕃衍似續。傳序無窮。故夫婦之道。世紀為大。古之哲后賢妃。皆推德逮下。薦達貞淑。不獨任已。是以茂衍來裔。長流慶澤。周之太妃。有逮下之德。故樛木形福履之詠。螽斯揚振振之美。終能昌大本支。綿固宗社。三王之隆。莫此為盛矣。故婦人之行。貴於寬惠。惡於妬忌。月星並麗。豈掩於末光。松蘭同畝。不嫌於

俱秀。自后妃以至士庶人之妻。誠能貞靜寬和。明大孝之端。廣至仁之意。不專一己之欲。不敵衆下之美。務廣君子之澤。斯上安下順。和氣蒸融。善慶源源。實肇於此矣。

教育

夏塗山氏。禹之妃也。生啓。禹治水。三過其門而不入。塗山氏獨明教訓而致其化。及啓長。化其德而從其教。卒致令名。禹為天子而啓為嗣。持禹之功而不殞。

周太姜賢而有色。生泰伯仲雍季歷。化導三子
皆成賢德。故周自太王肇基王迹。王季其勤
王家。文王誕膺天命。以撫方夏。武王周公脩
太平之業。太任太姒嗣續其美者。皆太姜廣
於德教之所致也。

太任摯任氏之中女。王季之妃也。太任之性
端一誠莊。惟德之行。及其有娠。目不視惡色
耳不聽淫聲。口不出敖言。生文王而明聖太
任教之以一而識百。卒為周宗。君子謂太任

為能胎教

太姒仁而明道。文王嘉之。生十男。號曰文母。太姒教誨十男。自少及長。常以正道夾持。未嘗見邪僻之事。卒成武王周公之德云。

漢明德皇后馬氏。明帝即位。以后為貴人。時后前母姊女賈氏。亦以選入。生章帝。帝以后無子。命養之后。盡心撫育。勞悴過於所生。章帝亦孝性淳篤。恩性天至。母子慈愛。始終無纖介之間。章帝即位。尊后為皇太后。常與帝旦

夕言道政事及教授諸小王。論議經書。述叙平生。雍和終日。

和熹皇后鄧氏。和帝崩。殤帝立。尊為皇太后。殤帝崩。定策立安帝。太后自入宮掖。從曹大家受經書。兼天文算數。晝省王政。夜則誦讀。又詔中官近臣於東觀受讀經傳。以教授宮人。左右習誦。朝夕濟濟。又徵和帝弟濟北河間王子。男女年五歲以上四十餘人。開邸第。教學經書。躬自監試。撫循詔導。恩愛甚渥。

唐太穆皇后竇氏。始太宗生有二龍之符。后於諸子中愛視最篤。自言於高祖。擇師以教。卒成聖德。太宗即位。嘗過慶善宮。覽觀哽歎。顧謂侍臣曰。朕生於此。今母后永違。育我之德。不可報矣。因號慟。

懿安皇后郭氏。生穆宗。憲宗崩。穆宗嗣位。尊號皇太后。穆宗崩。武宗立。喜畋游。角武抃。擇五坊小兒。得出入禁中。帝一日問后起居。從容請曰。如何可為盛天子。后曰。諫臣章疏宜

審覽度可用用之。有不可以詢宰相母拒直言。勿納偏言。以忠良為腹心。此盛天子也。帝再拜還。索諫章閱之。往往道游獵事。自是改幸為稀。小兒不復橫賜矣。

宋昭憲太后杜氏。太祖母也。太祖受周禪。即皇帝位。拜太后於堂上。衆皆賀。太后愀然不樂。左右進曰。臣聞母以子貴。今子為天子。胡為不樂。太后曰。吾聞為君難。天子置身兆庶之上。若治得其道。則此位可尊。苟或失馭。求為

匹夫不可得是吾所以憂也太祖再拜曰謹受教

章憲皇后劉氏真宗崩仁宗即位尚少太后保護盡力諭輔臣曰皇帝聽斷之暇宜詔名儒講習經史以輔其德於是設幄崇政殿之西日命近臣侍講讀焉

慈聖皇后曹氏性慈儉英宗方四歲育禁中拊鞠周盡迨為嗣子贊策居多仁宗崩英宗即位尊為皇太后神宗立尊為太皇太后嘗

語神宗曰。祖宗法度。不宜輕改。吾昔聞民間疾苦。必以告仁宗。因赦行之。今亦當爾。帝曰。今無他事。后曰。吾聞民間甚苦青苗助役。宜罷之。王安石誠有才學。然怨之者甚衆。帝欲愛惜保全之。不若暫出之於外。帝俯伏竦聽。憲聖皇后吳氏。高宗后也。初為才人。時帝擇宗室子養禁中。后得伯玖。更名璩。張婕妤得伯琮。張氏卒。併育于后。后視之無間。伯琮性恭儉。喜讀書。帝與后皆愛之。封普安郡王。后

嘗語帝曰。普安真天日之表也。帝意決立為皇子。封建王。嗣位。為孝宗。尊后曰壽聖太上帝后。光宗即位。更號壽聖皇太后。帝嘗言及用人。后曰。宜崇尚舊臣。後行慶壽禮。嘉王侍側。后勉以讀書。辯邪正。立綱常為先。

國朝

孝慈高皇后馬氏。性慈惠。嘗語諸王妃公主曰。無功受福。造化所惡。吾與若屬。被錦繡美飲。食終日無所為。當勤女工以報造物者。太子

諸王雖愛之甚篤。勉令務學。諄切懇至。嘗曰。汝父尊臨萬國。身致太平。亦由學以聚之。爾小子當思繼繼繩繩。以不辱所生。又曰。吾聞女史言。鄧禹為將。不妄殺人。故其女為后。吾家世忠厚。至吾父。雖無禹之功。然平生急於義。今日為后。非偶然也。汝輩異日有人民社稷之寄。尤必積累忠厚。乃可長世。切不可自恃而不務德。謂事有偶然也。汝切識之。諸王或以衣服器皿相尚者。

后曰。唐堯。虞舜。茅茨土階。夏禹。文王。惡衣卑服。
汝父儉朴。尤惡奢麗。日夜憂勤。以治天下。汝
輩無功。錦衣玉食。猶欲以服御相加。何志氣
不同如是乎。惟當親師取友。講論聖賢之學。
開明心志。自無此氣習也。

后有疾。

太祖嘗問曰。爾有身後之屬乎。

后對曰。惟

陛下當求賢人教育諸子。使進德脩業。子孫皆

賢臣民得所。妾雖死如生也。

帝曰然。

仁孝皇后徐氏。

太宗文皇帝初冊立。

仁宗皇帝為太子。

后言於

帝曰。太子國家之本。願擇老成端正之士。輔養德器。

帝曰。斯言正合朕意。既而又曰。

皇考之制東官官屬率以廷臣兼之任使一則
疑隙不生今凡宮臣之重者悉擇廷臣賢者
兼之

后曰此先朝鑒戒往古之失誠良法也雖萬世
當守而行之又曰長子仁厚足為令器不忝
祖宗矣

后有疾遺令皇太子曰吾祇事

皇上於今三十有二年上不能繼承

先皇后懿德吾甚愧之今至此命也奚悲爾吾

之長子。孝仁淳厚。當夙夜恪勤敬事。

君父。勿以吾故過哀毀。以傷

君父之心。吾素菲薄。無德及人。身沒之日。喪葬務從簡省。毋妨臣民往者。

皇上遭罹內難。躬率將士在外。吾母子留北京。敵兵圍城。將校士民之妻。皆擐甲胄。挾矢石。登城列陣。協力一心。以死固守。及內難平。吾正位中宮。富貴已極。而將校士民之妻。至今報賚未稱。吾寢食未嘗忘近聞。

皇上將巡狩北京。意願從行。將請恩澤及之。而
吾今不逮矣。爾能體吾心。九原無憾。嗚呼。主
器之任。在爾匪輕。敬以事上。仁以撫下。爾以
正家。恩以睦親。爾念之。○

后嘗作內訓。於母儀章有云。孔子曰。女子者。順
男子之教。而長其理者也。是故無專制之義。
所以為教。不出閨門。以訓其子者也。教之者。
導之以德義。養之以廉遜。率之以勤儉。本之
以慈愛。臨之以嚴恪。以立其身。以成其德。慈

愛不至於姑息。嚴恪不至於傷恩。傷恩則離姑息。則縱而教不行矣。詩云。載色載笑。匪怒伊教。夫教之有道矣。而在已者。亦不可不慎。是故女德有常。不踰貞信。婦德有常。不踰孝敬。貞信孝敬。而人則之。詩云。其儀不忒。正是四國。此之謂也。

五倫書卷之二十三

五倫書卷之二十四

易直方大。不習无不利。○含章可貞。或從王事。
无成有終。○君子敬以直內。義以方外。敬義
立而德不孤。○在師中。吉。○拔茅茹。以其彙。
征吉。○包荒。用馮河。不遐遺。朋亡。得尚于中。
行。○謙亨。君子有終。○勞謙。君子萬民服也。
○介于石。不終日貞吉。○由豫。大有得。勿疑。

朋盍簪○觀國之光○利用賓于王○樽酒簋
貳用缶○納約自牖○終无咎○王臣蹇蹇○匪躬
之故○勞而不伐○有功而不德○厚之至也○
臣不密則失身○幾事不密則害成○是以君子
慎密而不出也○德薄而位尊○知小而謀大○
力少而任重○鮮不及矣

書○臣弑隣哉○隣哉○臣弑○臣作朕股肱耳目○予
違汝弼○汝無面從○退有後言○欽四隣○股肱
喜哉○元首起哉○百工熙哉○百官脩輔○厥后惟

明明○式敷民德。永肩一心○股肱惟人。良臣惟聖○臣無有作福作威。王食。臣之有作福作威。王食。其害于而家。凶于而國○慎乃服命。率由典常。以蕃王室○惇瘝乃身。敬哉。天畏棐忱。民情大可見。小人難保。往盡乃心。無康好逸豫。乃其乂民○若有疾。惟民其畢棄咎。若保赤子。惟民其康乂○無作怨。勿用非謀。非彝。殺時忱。丕則敏德。用康乃心。顧乃德。遠乃猷。裕乃以民寧○越在外服。侯甸男。

衛邦伯。越在內服。百僚庶尹。惟亞。惟服。宗工。越百姓里居。罔敢湏于酒。不惟不敢。亦不暇。惟助成王德顯。越尹人祇辟。○民心無常。惟惠之懷。○懋乃攸績。睦乃四隣。以蕃王室。以和兄弟。廉濟小民。率自中。無作聰明亂舊章。詳乃視聽。罔以側言改廢度。○六卿分職。各率其屬。以倡九牧。阜成兆民。○欽乃攸司。慎乃出令。令出惟行。弗惟反。以公滅私。民其允懷。學古入官。議事以制。政乃不迷。○功崇惟

志業廣惟勤。惟克果斷。乃罔後艱。位不期驕。
祿不期侈。恭儉惟德。無載爾僞。作德心逸。日
休。作僞心勞。日拙。居寵思危。罔不惟畏。弗畏
入畏。推賢讓能。庶官乃和。不和政厖。舉能其
官。惟爾之能。稱匪其人。惟爾不任。○敬爾有
官。亂爾有政。以佑乃辟。永康兆民。萬邦惟無
斁。○圖厥政。莫或不艱。有廢有興。出入自爾。
師虞。庶言同則繹。爾有嘉謀嘉猷。則入告爾
后于內。爾乃順之于外。曰斯謀斯猷。惟我后

之德○無依勢作威。無倚法以削寬而有制。
從容以和○爾無忿疾于頑。無求備於一夫。
必有忍。其乃有濟。有容德乃大○罔曰弗克。
惟既厥心。罔曰民寡。惟慎厥事○爾身克正。
罔敢弗正。民心罔中。惟爾之中○懋乃后德。
交脩不逮。慎簡乃僚。無以巧言令色。便辟側
媚。其惟吉士○爾無昵于憊人。充耳目之官。
迪上以非先王之典○如有一介臣。斷斷猗。
無他技。其心休休焉。其如有容焉。人之有技。

若已有之。人之彥聖。其心好之。不啻如自其口出。是能容之。以保我子孫黎民。亦職有利哉。

詩。羔羊之皮。素絲五紵。退食自公。委蛇委蛇。○彼其之子。邦之司直。○淑人君子。其儀不忒。其儀不忒。正是四國。○我有嘉賓。德音孔昭。示民不忒。君子是則是效。○四牡騤騤。周道倭遲。豈不懷歸。王事靡盬。我心傷悲。○皇皇者華。于彼原隰。駉駉征夫。每懷靡及。○我馬

維駒六轡如濡。載馳載驅。周爰咨諏。○樂只君子。民之父母。樂只君子。德音不已。○顯允君子。莫不令德。○有嚴有翼。共武之服。共武之服。以定王國。○靖共爾位。正直是與。神之聽之。式穀以女。○左之左之。君子宜之。右之右之。君子有之。維其有之。是以似之。○之屏之翰。百辟為憲。不戢不難。受福不那。○彼交匪紆。天子所予。○樂只君子。殿天子之邦。○予曰有疏附。予曰有先後。予曰有奔走。予曰

有禦侮○有馮有翼。有孝有德。以引以翼○
藹藹王多吉士。維君子使。媚于天子○藹藹
王多吉人。維君子命。媚于庶人○四國于蕃。
四方于宣○令儀令色。小心翼翼。古訓是式。
威儀是力。天子是若。明命使賦○出納王命。
王之喉舌。賦政于外。四方爰發○既明且哲。
以保其身。夙夜匪解。以事一人○柔亦不茹。
剛亦不吐。不侮矜寡。不畏彊禦○夙夜匪解。
虔共爾位。朕命不易。幹不庭方。以佐戎辟○

無封靡于爾邦。維王其崇之。○有來雖雖。至止肅肅。○載見辟王。曰求厥章。龍旂陽陽。和鈴央央。儻革有鶻。休有烈光。○濟濟多士。克廣德心。

春秋左氏傳。仁以接事。信以守之。忠以成之。敏以行之。事雖大必濟。○人所以立。信知勇也。信不叛君。知不害民。勇不作亂。○君子長國家者。非無賄之患。而無令名之難。○臣之祿。君實有之。義則進。否則奉身而退。○臨患不

忘國忠也。思難不越官。信也。圖國忘死。忠也。
○畏君之威。聽其政。尊其貴。事其長。養其親。
五者所以爲國也。○忠。信。禮之器也。卑讓。禮
之宗也。辭不忘國。忠信也。先國後已。卑讓也。
○苟利社稷。死生以之。○在禮。家施不及國。
民不遷。農不移。工賈不變。士不濫。官不滔。大
夫不收公利。○君所謂可而有否焉。臣獻其
否以成其可。君所謂否而有可焉。臣獻其可
以去其否。是以政平而不干。民無爭心。○政

寬則民慢。慢則糾之以猛。猛則民殘。殘則施之以寬。寬以濟猛。猛以濟寬。政是以和。○臣有臣之威儀。其下畏而愛之。故能守其官職。保族宜家。○政如農工。日夜思之。思其始而成其終。朝夕而行之。行無越思。如農之有畔。其過鮮矣。○共而從君。神之所福也。

春秋公羊傳。大夫受命不受辭。出竟有可以安社稷利國家者。則專之可也。

國語敬。所以承命也。恪。所以守業也。恭。所以給

事也。儉所以足用也。○事君者竭力以役事
不聞違命。君立臣從。何貳之有。○事君者君
為我心。制不在我。○信於君心則美惡不踰
信於名則上下不干。信於令則時無廢功。信
於事則民從事有業。○事君者比而不黨。夫
周以舉義比也。舉以其私黨也。○無功庸者
不敢居高位。○委質為臣無有二心。委質而
策死古之法也。○夫事君者諫過而賞善。薦
可而替否。獻能而進賢。擇才而薦之。朝夕誦

善敗而納之道之以文行之以順勤之以力
致之以死○夫事君者不為外內行不為豐
約舉

禮記大夫士出入君門由闌右不踐闕○賜果
於君前其有核者懷其核御食於君君賜餘
器之溉者不寫其餘皆寫○凡為君使者已
受命君言不宿於家君言至則主人出拜君
言之辱使者歸則必拜送于門外若使人於
君所則必朝服而命之使者反則必下堂而

受命○大夫士下公門式路馬○立則磬折
垂佩。主佩倚。則臣佩垂。主佩垂。則臣佩委○
君命大夫與士肄。在官言官。在府言府。在庫
言庫。在朝言朝○事君有犯而無隱○為人
臣者無外交。不敢貳君也○凡有指畫於君
前用笏。造受命於君前則書於笏○君賜車
馬。乘以拜賜。衣服。服以拜賜。君未有命。勿敢
即乘服也○為人臣下者。有諫而無訕。有亡
而無疾。頌而無諂。諫而無驕。急則張而相之。

廢則埽而更之。謂之社稷之役。○君子之事君也。必身行之。所不安於上。則不以使下。所惡於下。則不以事上。○善則稱君。過則稱己。○下之事上也。雖有庇民之大德。不敢有君民之心。仁之厚也。是故君子恭儉以求役仁。信讓以求役禮。不自尚其事。不自尊其身。儉於位而寡於慾。讓於賢。卑己而尊人。小心而畏義。求以事君。得之自是。不得自是以聽天命。○事君難進而易退。則位有序。易進而難

退則亂也。故君子三揖而進。一辭而退。以遠
亂也。○事君慎始而敬終。○事君軍旅不避
難。朝廷不辭賤。處其位而不履其事。則亂也。
○大臣不可不敬也。是民之表也。迺臣不可
不慎也。是民之道也。○下之事上也。身不正。
言不信。則義不一。行無類也。

論語。臣事君以忠。○不患無位。患所以立。○可
以託六尺之孤。可以寄百里之命。臨大節而
不可奪也。君子人歟。君子人也。○所謂大臣

者以道事君○居之無倦行之以忠○苟正其身矣於從政乎何有○行已有恥使於四方不辱君命可謂士矣○君子易事而難說也說之不以道不說也及其使人也器之○勿欺也而犯之○不在其位不謀其政○君子思不出其位○志士仁人無求生以害仁有殺身以成仁○事君敬其事而後其食○行義以達其道○君子學道則愛人○君子信而後勞其民未信則以為厲已也信而後

諫未信則以為謗已也○君子之仕也行其義也○士見危致命見得思義○仕而優則學學而優則仕

大學聽訟吾猶人也必也使無訟乎無情者不得盡其辭大畏民志此謂知本○君子不出家而成教於國孝者所以事君也弟者所以事長也慈者所以使衆也○有諸已而後求諸人無諸已而後非諸人○所惡於上毋以使下所惡於下毋以事上所惡於前毋以先

後所惡於後。毋以從前。所惡於右。毋以交於左。所惡於左。毋以交於右。此之謂絜矩之道。○見賢而不能舉。舉而不能先。命也。見不善而不能退。退而不能遠。過也。○畜馬乘不察於雞豚。伐冰之家。不畜牛羊。百乘之家。不畜聚斂之臣。與其有聚斂之臣。寧有盜臣。

中庸。在上位不陵下。在下位不援上。正己而不求於人。則無怨。上不怨天。下不尤人。○在下位不獲乎上。民不可得而治矣。獲乎上有道。

不信乎朋友不獲乎上矣信乎朋友有道不
順乎親不信乎朋友矣順乎親有道友討之
不誠不順乎親矣誠身有道不明乎善不誠
乎身矣

孟子我非堯舜之道不敢以陳於王前○責難
於君謂之恭陳善閉邪謂之敬○欲為臣盡
臣道○惟大人為能格君心之非君仁莫不
仁君義莫不義君正莫不正一正君而國定
矣○君子之事君也務引其君以當道志於

仁而已○古之人得志澤加於民不得志脩身見於世窮則獨善其身達則兼善天下○有安社稷臣者以安社稷為悅者也有天民者達可行於天下而後行之者也有大人者正己而物正者也○居仁由義大人之事備矣

孝經非先王之法服不敢服非先王之法言不敢道非先王之德行不敢行○資於事父以事君而敬同○故以孝事君則忠以敬事長

則非忠順不失。以事其上。然後能保其祿位。而守其祭祀。○君子之事親孝。故忠可移於君。○君子之事上也。進思盡忠。退思補過。將順其美。匡救其惡。故上下能相親也。

家語。忠臣之諫。君有五義焉。一曰譎諫。二曰懇諫。三曰降諫。四曰直諫。五曰諷諫。唯度主而行之。○人臣而忠其君者。爵祿不足以賞也。諛其君者。刑罰不足以誅也。○知為吏者。奉法以利民。不知為吏者。枉法以侵民。○治官

莫若平。臨財莫若廉。廉平之守不可改也。○
貞以幹之。敬以輔之。施仁無倦。見君子則舉
之。見小人則退之。○人臣之節當君大事。惟
力所及。死而後已。

莊周曰。臣之事君。義也。無適而非君也。無所逃
於天地之間。是之謂大戒。○夫事其君者。不
擇事而安之。忠之盛也。

荀卿曰。君子行不貴苟。難說不貴苟。察名不貴
苟。專唯其當之為貴。○君子寬而不慢。廉而

不劇○上則能尊君下則能愛民物至而應
事起而辨○政法令舉措時聽斷公上則能
順天子之命下則能保百姓○下臣事君以
貨中臣事君以身上臣事君以人○上則能
尊君下則能愛民政令教化形下如影○恭
敬而遜聽從而敏不敢有私決擇也不敢有
私取與也以順上為志○忠信而不諛諫爭
而不諂矯然剛折端立而無傾側之心○有
大忠者有次忠者有下忠者有國賊者以德

復君而化之大忠也。以德調君而補之次忠也。以是諫非而怒之下忠也。不恤君之榮辱不恤國之臧否。偷合苟容。以之持祿養交而已耳。國賊也。○言有召禍也。行有召辱也。君子慎其所立乎。主尊貴之。則恭敬而傳。主信愛之。則謹慎而嘽。謹慎利也。聞怒害也。故君子安禮樂義。謹慎而無闕怒。是以百舉不過也。○凡流言。流說。流事。流謀。流譽。流愬。不官而衡至者。君子慎之。

蘇從曰。慶君之高爵。食君之厚祿。愛其死而不諫其君。則非忠臣也。

王蠋曰。忠臣不事二君。

肥義曰。貞臣也。難至而節見。忠臣也。累至而行明。

賈山曰。為人臣者。盡忠竭愚。以直諫主。○大臣不得與宴游。方正脩絜之士。不得從射獵。使皆務其方。以高其節。則群臣莫敢不正身脩行。以稱大禮。

賈誼曰。為人臣者。主爾亡身。國爾忘家。公爾忘私。利不苟就。害不苟去。唯義所在。○顧行而忘利。守節而伏羲。故可以託不御之權。可以寄六尺之孤。

枚乘曰。忠臣不敢避誅。以直諫。故事無廢業。而功流於萬世也。

董仲舒曰。受祿之家。食祿而已。不與民爭業。然後利可均布。而民家可足。

蓋寬饒曰。山有猛獸。藜藿為之不采。國有忠臣。

奸邪爲之不起

說苑人臣之術順從而復命無所敢專義不苟
合位不苟尊必有益於國必有補於君○虛
心白意進善通道勉主以禮義諭主以長策
將順其美匡救其惡功成事立歸善於君不
敢獨伐其勞○夙興夜寐進賢不解數稱往
古德行之事以厲主意庶幾有益以安國家
○守文奉法任官職事辭祿讓賜不受贈遺
○貴視其所舉富視其所與貧視其所不取

窮視其所不爲○賢臣之事君也受官之日以主爲父以國爲家以士人爲兄弟故苟有可以安國家利民人者不避其難不憚其勞以成其義○夫士欲立義行道毋論難易而後能行之立身著名無顧利害而後能成之○臣勞動以爲君而不求其賞○位已高而意益下官益大而心益小祿已厚而慎不敢取○去傲倖務忠信節嗜欲無取虐於人○人臣之公治官事則不營私家在公門則不

言貨利當公法。則不阿親戚。奉公舉賢。則不避仇讎。忠於事君。仁於利下。推之以恕。道行之以不黨。○奉國法而不黨。施刑戮而不亂。可謂公平。○食其食者。死其事。受其祿者。畢其能。○官怠於宦成。

新序事君者。內其祿而外其身。○官事君者也。其交皆誠信。有好善。如此者。事君日益。官職日進。○臣事君猶子事父也。子為父死。無所恨。守節不移。雖有鈇鉞湯鑊之誅。而不懼也。

尊官顯位而不榮也○知命之士見利不動
臨死不恐為人臣者時生則生時死則死是
謂人臣之禮故上知天命下知臣道

賈堅曰與其屈辱而生不若守節而死

王濬曰事君之道苟利社稷死生以之若顧嫌
避咎此人臣不忠之利非人主社稷之福

王通曰忠臣之事君也盡忠補過君失於上則
臣補於下臣諫於下則君從於上此王道所
以不跌也○廉者常樂而無求

陸贄曰。承問而對。臣之職也。寫誠無隱。臣之忠也。○知無不言之謂盡。事君以義之謂忠。○人之所助在乎信。信之所立由乎誠。循誠於忠。可以俾衆無惑。存信於已。可以教人不欺。唯信與誠。有補無失。○臣子之於君父也。盡其敬而敬焉。盡其愛而愛焉。

韓愈曰。臣者。行君之令而致之民者也。○百官者。承君之化者也。任有小大。惟其所能。○入則諫其君。出則不使人知者。大臣宰相之事。

○君子居其位。則思死其官。未得位。則思脩其辭。以明其道。○古之君子。相其君也。一夫不獲其所。若已推而內之溝中。

柳宗元曰。能者進而由之。使無所得。不能者退而休之。亦莫敢愠。不銜能。不矜名。不親小勞。不侵衆官。日與天下之英才討論其大經。○相道得而萬國理矣。○奉王制脩古典至敬也。尊朝覲率貢職至忠也。執忠與敬。臣道畢矣。

柳玘曰。涖官則潔已省事。而後可以言守法。
王禹偁曰。三公論道。六卿分職。張其教矣。○北
民未安思所泰之。四方未附思所來之。兵革
未息。何以弭之。田疇多蕪。何以闢之。賢人在
野。我將進之。佞臣立朝。我將斥之。六氣不和。
災眚荐至。願避位以禳之。五刑不錯。欺詐日
生。請脩德以釐之。

張詠曰。事君者。廉不言貧。勤不言苦。忠不言已
效。公不言已能。

范仲淹曰士當先天下之憂而憂後天下之樂而樂○居廟堂之高則憂其民處江湖之遠則憂其君

歐陽脩曰所謂大臣者必能宣布上德叶和中外使人心悅豫朝政肅清○高秩厚祿人臣所願必也處之無媿然後得以為榮○士不忘身不為忠言不逆耳不為諫○不避雷霆之威不畏權臣之禍此乃至忠之臣也○人臣之能盡忠者不敢避難言之事○有所不

是之謂廉。有所不為之謂恥。

周敦頤曰。善人多。則朝廷正而天下治矣。○賢才輔則天下治。○公於已者。公於人。未有不公於已而能公於人也。○君子以道充為貴。身安為富。故常泰無不足。

賈昌朝曰。仕宦之法。清廉為最。聽訟務在詳審。用法必求寬恕。

程顥曰。一命之士。苟存心於愛物於人。必有所濟。○直已守道。所以濟時。枉道徇人。徒為失。

已

程頤曰。為臣之道。當使恩威一出於上。衆心皆隨於君。若人心從已。危疑之道也。○有翦桐葉之戲。則隨事箴規。違養生之戒。則即時諫止。○人臣以忠信善道結於君心。必自其所明處。乃能入也。人心有所蔽。有所通。蔽者暗處也。通者明處也。當就其明處以告之。求信則易也。○臣之於君。竭其忠誠。致其才力。用否在君而已。不可阿諛逢迎。以求君之厚已。

也○事君者知人主不當自聖則不為諂諛之言。知人臣義無私交則不為阿黨之計○君子之事君也。不得其心則盡其誠以感發其志。誠積而動則雖昏蒙可開也。雖柔弱可輔也。雖不正可正也。古之人事庸君常主而克行其道者以已誠上達而其君信之之篤耳○人臣身居大位。功蓋天下而民懷之。則危疑之地也。誠積於中。動不違理。威福不自已出。人唯知君而已。然後位極而無逼上之

嫌勢重而無專權之過斯可謂明哲君子矣
周公孔明其人也。郭子儀有再造社稷之功
威震人主而上不疑之也。亦其次歟。○臣賢
於君則輔君以所不能。伊尹之於太甲。周公
之於成王。孔明之於劉禪是也。臣不及君則
贊助之而已。○人臣之義。位愈高而思所以
報國者當愈勤。

張載曰。近臣守和。和其心以備顧對。不可徇其
喜怒好惡。

司馬光曰。凡人臣者。上以事君。中以利國。下以養民。釋此三者。非人臣也。○忠臣憂公如家。見危致命。○身為宰相。知其君之過。不以告。而私語於家。非忠臣也。○為人臣者。策名委質。有死無二。○忠臣之事君也。責其所難。則其易者不勞。而正補其所短。則其長者不勸。而遂。○報國之忠。莫如薦士。負國之罪。莫如蔽賢。○忠臣之志。莫先於嫉邪。

蘇軾曰。以義正君。而無害于國。可謂大臣矣。○

人臣執法而不求情盡心而不求名出死力以捍社稷使天下之心繫於一人而已不與焉○慎重則必成輕發則多敗

蘇轍曰輔君之善而補其不足此誠大臣之事楊時曰人臣之事君豈可佐以刑名之說如此是使人主失人心也人主無仁心則不足以得人心故人臣能使其君視民如傷則王道行矣

陳公輔曰愛君憂國先義後利平居犯顏逆耳

不計一身之利害。緩急伏節死難。不顧一家之存亡。

黃龜年曰。一言而盡事君之道。曰忠。罪莫大於欺君。一言而盡輔政之道。曰公。罪莫大於私己。

呂本中曰。當官之法。惟有三事。曰清。曰慎。曰勤。知此三者。則知所以持身。知此三者。可以保祿位。可以遠恥辱。可以得上之知。可以得下之援矣。

胡安國曰。臣之事君。猶子之事父。以忠信為本。
范祖禹曰。人臣以難事責於君。使其君為堯舜
之君者。尊君之大也。開陳善道以禁閑其君
之邪心。惟恐其君或陷于有過之地者。敬君
之至也。

胡寅曰。臣之事君。以行安民之術也。○大臣欲
正君心。必先自正其心。其心不正。如正君何。
○臣之事君。格其非心。褊狹者宜廓。以寬弘。
急促者宜道。以紆緩。○忠愛其君者。必思納。

諸無過之地而不計一身之安危○忠賢之
於事有所不可亦陳其正理以開悟君心而
已

胡宏曰。守身以仁。以守身之道正其君者。大臣
也。○有其德。無其位。君子安之。有其位。無其
功。君子恥之。○當爵祿而不輕。行道德而不
舍者。君子人歟。君子人也。○知道之臣。寧有
死於其分。而無犯分以徼功也。○德之大小
當其位才之高下。當其職。人務自脩而不僥。

倖於上人知自守而不冒昧求進人知自重而不輕用其身人能有恥而不苟沒於利所以仕路清政事治風俗美天下安寧四夷慕義

張浚曰事君者必此心純一而後能有感格

岳飛曰荷國厚恩當以忠義報國

胡銓曰臣事君猶子事父知無不言若於君有隱則於父亦有隱也非忠孝也

陳俊卿曰人臣以不欺為忠而論事必達於大

體

羅從愿曰。士之立朝。要以正直忠厚為本。正直則朝廷無過失。忠厚則天下無嗟怨。二者不可偏也。一於正直而不忠厚。則漸入於刻。一於忠厚而不正直。則流入於懦。汲黯正直。所以闢公孫弘之阿諛。忠厚所以闢張湯之殘刻。武帝享國五十五年。其臣之賢。獨此一人而已。○立朝之士。當愛君如愛父。愛國如愛家。愛民如愛子。然三者未嘗不相賴也。凡人

愛君則必愛國。愛國則必愛民。未有以君為心而不以民為心者。○士之立身。要以名節。忠義為本。有名節。則不枉道以求進。有忠義。則不固寵以欺君矣。

朱熹曰。古之君子居大臣之任者。其於天下之事。知之不惑。任之有餘。則汲汲乎其時而勇為之。知有所未明。力有所未足。則咨訪講求。以進其知。拔援汲引。以求其助。如拯火追亡。尤不敢以少緩。上不敢愚其君。以為不足與。

言仁義。下不敢鄙其民。以為不足以興教化。中不敢薄士大夫。以為不足以成事功。一日立乎其位。則一日業乎其官。一日不得乎其官。則不敢一日立乎其位。有所愛而不肯為者。私也。有所畏而不敢為者。亦私也。屹然中立。無一毫私情之累。而唯知其職之所當為者。夫如是。是以志足以行道。道足以濟時。而於大臣之責。可以無媿矣。○士大夫出身事主。上則使其君為堯舜之君。下則使其民為

堯舜之民○誠以天下之事為己任。則當自
格君心之非始。欲格君心。則當自身始○欲
圖大者。當謹於微。欲正人主之心術。未有不
以嚴恭寅畏為先務。聲色貨利為至戒○大
臣以得士為功。下士為難。而士之所守。乃以
不自失為貴○於天下之事。有可否則斷之
以公道。而勿牽於內顧偏聽之私。於天下之
議。有從違。則開以誠心。而勿誤為陽開陰闔
之計。則庶乎德業盛大。表裏光明。中外遠近

心悅誠服○守官只要律已公廉執事勤謹
晝夜孜孜如臨淵谷○臣子無愛身自佚之
理○今人仕宦不能盡心盡職者是無那先
其事而後其食底心

張栻曰。後世道學不明。論至道者。不過及於人
才政事而已。孰知其本在於君心。而孰知格
君之心。乃在於吾身乎○古人未嘗不謙。至
周公方說謙。蓋周公以天子之叔父。而又為
宰相。猶且自處以謙。若在吾人。則亦合當為

者也。謙之九三。伊川專以指周公。德言盛。禮言恭。德只要盛。禮只要恭。又曰。某於世間無所愛慕。亦無所享用。唯有報君愛民之事。在所當為耳。

陸子靜曰。共其職。勤其事。心乎國。心乎民。而不為身計。其得不謂之君子乎。○古人所以不屑屑於間政。適人而必務有以格君心者。蓋君心未格。則一邪黜。一邪登。一弊去。一弊興。如循環然。何有窮已。及君心既格。則規模趨

嚮有若燕越邪正是非有若蒼素大明既升
群陰畢伏是瑣瑣者亦何足汙人牙頰間哉
呂祖謙曰進諫之道使人君畏吾之言不若使
人君信吾之言使人君信吾之言不若使人
君樂吾之言○人臣之憂在於諫之未善不
在於君之未從○講論治道不當言主意難
移當思臣道未盡不當言邪學難勝當思正
學未明○忘其身者事君之忠

黃榦曰臣子之於君父與生俱生而不可懈於

心者也。食人之祿者。當任其事。此亦不待智者而後知也。

真德秀曰。臣之事君。以恭為本。然必忠誠不二。然後可貴。○大臣以正理事君。君之所行有不合正理者。必規之。拂之。不苟從也。○人臣之義。以忠直為本。○古今人臣事業未嘗無所本。諸葛武侯平生所立事業。奇偉然求其所由。則開誠心。布公道。集衆思。廣忠益。蓋此四者。乃武侯事業之本。而誠之與公。又其本。

也。○忠臣之心。常欲君身之強固。君德之清明。故動以聲色。游畋為藥石之戒。古之人有行之者。周公是也。君身強固。則必不倦於政。機而威權在己。君德清明。則必不謬於邪正。而用舍合宜。此正人君子之所深願。有志愛君。其可不以周公為法。

劉靜春曰。人臣事君。股肱心腹。無有二事。故居中。則格其非心。用賢人行善政。在外則安邊陲。固根本。選士而進之。用心一也。

許衡曰。臣子執威權。未。有。無。禍。者。豈。唯。人。事。在。天。道。亦。不。許。夫。月。陰。魄。也。借。日。為。光。與。日。相。遠。則。光。盛。猶。臣。遠。於。君。則。聲。名。大。威。權。重。與。日。相。近。則。光。微。愈。近。愈。微。臣。道。陰。道。理。當。如。此。大。臣。在。君。側。而。擅。權。此。危。道。也。古。人。舉。善。薦。賢。不。敢。自。名。欲。恩。澤。出。於。君。也。刑。人。亦。然。恩。威。豈。可。出。於。已。是。生。多。少。怨。敵。其。危。亡。可。立。待。也。故。月。星。皆。借。日。以。為。光。及。近。日。却。失。其。光。此。理。殊。可。玩。索。

五倫書卷之二十四